



Minggu, 12 November 2023
Ogen : Lukas 1:6



Sendalanan Ras Perbulangan



Petembil, usur jumpa das, la banci ndekah ercakup, minter rubat, erkiteken si e nge maka dekahen kami kede kopi asangkan rumah nina sekalak perbapan paksa isungkun kerna komunikasina ras nande tengah jabu. Jababpen enda jadi jabapen klasik si usur ibegi i bas piga-piga kalak. Guna si e terdauhen igargari me engkai maka la sendalanan?

Jabu e me karya Dibata njadikan dua kalak si la seri jadi sada alu tujun ncidahkan kemulian Tuhan. Bena-benana perjabun kerina nge ermeriah ukur, sendalanan, bagi perik si dua-dua; ku ja sada ku je duana. Tapi i bas perdalanan piga-piga tahun lit perubahren si jadi, piah dungna lanai banci ndekah ras-ras subuk bas ercakup, erdahin ras sidebanna. Wari enda tole ipelimbarui me kita kerna kiniulin hubunganen i bas jabu kususna hubunganen ndehara ras perbulangen.

Elisabet ndehara Sakaria. Pasangen enda sendalanan i bas ndalani kegeluhen perjabunna. Duana ia nggeluh rikutken ate Dibata ngena. Idalankenna pedah ras undang-undang Tuhan. Uga patutnna, uga arusna bage me ia nggeluh.

Jadi arah ogenta enda teridah kunci kiniersadan e me ngeluh rikutken si ngena ate Dibata. Dibata jadi palas dengen tujun perjabun. Kata Dibata ngiket, empersada ras si engkuasai kegeluhen. Isi kata Dibata pelin-pelin kerna kekelengen, tentuna adi e sibahan bas mbangun komunikasi i tengah-tengah jabu tercipta kemalemen ate. Kepatuhenta nandangi Dibata me simabai kita uga arusna ersikap, rukur ras erbelas alu payo hususna man perbulangen. Nggeluh sendalanan ras perbulangen jadi sada perjuanganen si arus tetap lit i bas pusuh. Aminna pe melala tangtangen subuk arah perbulangen i bas tengah-tengah jabu, tapi ula kita surut. Sabap sieteh maka iblis e siap ngerayu ia katawari paksa pe. Tetaplah teneng dengen metenget janah paguh kiniteken (bd. 1 Pet 5:8). Tetap bangun komunikasi si mehuli alu dem kekelengen.

“Tuhan mpesada ndehara ras perbulangen segelahi sendalanan.”



